

HEBREOS COMINIMO ORETAGA RABE

*Jesucristo rafuena jai cai cacajamona,
Jusiñamuiña jai uiñoticaí*

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena lollena, jiaicaiño ie jaienisaína orede. Jiaicaiño nicai anado Jusiñamui ie rafuena llote. Iena lollena, jiaicaiño ie facaina lloraini micoriaína orede; ² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. ³ Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisaí baifemo faite

⁴ Jusiñamui Jitona naimie illamona, naimie illano Jusiñamui jaienisaí illano baifemo faite. Ie

illanomona naimie Jusiñamui jaienisaí baífemo faiana uiñotícaí. ⁵ Jusiñamuidí: “Cue Jitodio” Cristomo llote; iadedí ie jaienisaímo iese lloñede. Jiaícaíño llote: “Naimie Moodicue. Naimie cue Jito” llote. Ie jaienisaí ie Jito baífemo faíñena jira, ie jaienisaímo iena jaca lloñede. ⁶ Ie dajede Jito eníruemo oretaja facaiseconi Jusiñamui llote: Nana cue jaienisaí naimiemo iobillacinona fecaja; ⁷ iadedí jiaíe rafuedo ie jaienisaína ñaíte: Cue ocuilla rafuena naimaci finollena, cue ocuilla diese naimacina oretacabitícue. ⁸ Ie Jitona ñaianona raíte: Cue isoi o illa jira, comínina o sedajafue jaca iíte. Eo marecinodo comínina jaca sedadio. ⁹ Mare rafue finuana jitaídío. Maraiñedicinona finuana jitaíñedio. Ie jira ona caímare jai itataticue. Monamo o abído billanona, cue jaienisaí baífemo ona caímare itataticue raíte. ¹⁰ Jiaícaíño Jusiñamui ie Jitona raíte: Cue isoi o illa jira, o uai díga nanodofoconi eníruena jaié finodío. Mona jiaí finodío. ¹¹ Bie eníruedi mona díga íco fuite. Iníroi fuilla isoi, íñeíte; iadedí odí jaca iítío. ¹² Eníruena mona díga meidotaitío; iadedí odí jaca daje isoítío. Jaca iítío raíte. ¹³ Ie Jitomo buena llote; ia ie jaienisaímona damiemo iese lloñede. Ie Jitomo llote: Illaímana o illamona, cue nabei díne ana raí. Nana o díbeimo íñedinona o anamo itataítícue.

¹⁴ Ie jaienisaimo iena lloñede; iadedi naimacina oretacabite, ie Jitona innotinona canollena. Ie jira nana naiemona, ie Jito ie jaienisai baifemo faiana uiñoticaí.

2

Jusiñamui caina jillotaja rafuena cai jamaiñena

¹ Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai inuasa. ²⁻³ Ero, Jusiñamui ie jaienisaina jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise inoñenia, Jusiñamui naimiena eo duere finode. Jusiñamui jaienisai lloga rafue mare; iadedi Cristo birui lloga rafue jaienisai jaie lloga rafue baifemo faia jira, Cristo rafuena cai inoñenia, Jusiñamui caina duere finollemona ua jilloñeiticaí. Ero, naimie cai jeacinomona caina jillotaiacade. Naie rafuena cai jamaia, iena cai inoñenia, naimie caina duere finollemona ua jilloñeiticaí. Cai Nama Cristo naie rafuena jaie llote. Naimiena cacadinodi caimo iena jai llotimaci. Cristo rafuedi uanaicinona llotimaci. ⁴ Jusiñamui uai diga jiaiforiende siño rafuena naimaci finuamona, Cristo rafuedi uanaicinona uiñoticaí. Naimie jitailla diese naga creyentemo Jusiñamuidi ie uaina itatate. Naga creyente naimie dibeimo raise maijillena, ie uaina itatate. Naga creyentemo naie uai illamona, Cristo rafuedi uanaicinona uiñoticaí. Ie jira naie rafuena cai inuasa.

Cai isoi illena, Jesucristo imana jaide

⁵ Jusiñamuidi ie jaienisaina oretauide, ie jitailla rafuena naimaci finollena; iadedi naimaci anamo cominico illena jaca lloñede. Cristo anamo cominico illena llote. ⁶ Jusiñamuimo David micori iena jaie llote:

Cai jamai bue isoidicai; iadedi caimo comecina facadio.

Jamai cominidicai; iadedi caina canodio.

⁷ Caina cominina o finua jira, o jaienisai isoi iñedicai.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

⁸ Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira.

⁹ Jesúsna dane lloiticue. Naimiena uiñoticaí. Eniruemo naimie jaie billamona, Jusiñamui ecimona naimie billa jira, Jusiñamui jaienisai illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamona, Jusiñamui naimiena iobitade. ¹⁰ Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicai. Naimie illanomo ico iiticaí. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona,

naimiena ñnotinodicaina jai raise canorede.

¹¹ Naimie fiodaillamona marebicaidicai. Naimie ñibeimo jai cai illa jira, daajena mooredicai. Ie jira naimiedi: “Cue cominidomoi” caina meiruiñeno lloste. ¹² Jusiñamui facaina lloraini micoriai

llogacinomona naie rafue uanaicinona uinoticaí. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci

jaie llotimaci. ¹³ Jesúsna dane ñaitimaci:

Ie comini diga naimiedi Jusiñamuina ñinocana jaite.

Jusiñamui cominina damierie jailla jira, naimacidi jiai naimie comini

ñaitimaci. Naimaci ñaia isoi, Jusiñamui cominina birui jaidicai. ¹⁴ Jusiñamuina ñnotinodi cominina jira, cai isoi naimie illena, Jesúsdi comena jaide.

Cai fiodailla isoi, naimie jiai fiodaite. Taife uaina cai ñnoia, jeacino finodicai. Iemona fiodaicana jaidicai. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui ñibeimo iñenanomona jai jillodicai. ¹⁵ Jesús nia fiodaiñenia, nana cai illa ñinori fiodaillana jaciruicana jaidicai. Jesús jai fiodailla jira, caina jaciruillacino anamona jillobitade. ¹⁶ Jeacino anamo naimaci iñena jira, Jusiñamui jaienisaímo ie comecina facañede; iadedi Abraham micori isoi ñnotinomo naimie comecina facade. Naimacina naimie jilloitallena, naimiedi comena jaide.

¹⁷ Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faiamona, naimie fueollena, naimiena orede. Cai illana raise uinote. Iemona caina dueruite. Jusiñamui

jitaillacino finuana raise uifnote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamuimo jicanote. ¹⁸ Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie ñnoñena jira, caina canorede. Taife uaina cai finoñellena, cai comeciaina ocuiñotade.

3

Jesús Moisés micori baifemo faite

¹ Cue amatiaí, jeacino anamo omoi jai iñena jira, ie díbeimo omoína Jesús jai fetua jira, naimie siño jitona jira, naimiemo omoi comeciaina faca. Naimiēna ja ñaiticue. Ie rafuena lollena, Jusiñamui naimiēna orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima. ² Ie Moo cominina naimie raise sedajanona, naimiedi ie Moo uaina ñnuanona, iēna finode. Nana Israel cominina naimie sedajanona, Moisés micori Jusiñamui uaina ñnuanona, iēna finode. ³ Jusiñamuimona Jesúdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúri Jusiñamui iobide. Cai jillua jira, Jusiñamui cominina jaidicai. ⁴ Buena cai finuamona, naimie cominina jaiñedicai; iadedi naimie caina ie cominina dama itatarede. ⁵ Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiēmona Jusiñamui ico lolle

uaidi uanaicinona uiñoticaí. ⁶ Jusiñamui facaina maijianona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñinocana jaia, naimiemo camare cai ocuria, Jusiñamui ua cominidicaí.

Jusiñamuimona abido cai jaiñellena, bie rafuemonacaí fueua

⁷ Jusiñamui Joreño caimo birui lloia, iena cacarei. Ero, Jusiñamui jaie llwana cuetate:

⁸ Omoi jaiagai isoi iñeno.

Jofue iñenanomo omoi jaiagai ia, cue uaina ñinoñedimaci.

⁹ “Naimie uaina raise uiñoticaí” raillanona, cuena facacabitimaci.

Cuarenta años cue siño finoca rana ciodimaci; iadedi jaca ñinoñedimaci.

¹⁰ Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacaiñedomoi”.

¹¹ Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

¹² Cue amatiaí, cai jaiagai rafuena cai uiñuamona, cai fueua. Uanaí Jusiñamuimona abido omoi jaiñellena, naimie jai lloga rafuena omoi ñinocana jai. Omoimona bu raise ñinoiacaiñenia, naimiemo llono.

¹³ Jusiñamui rafuena omoi raise ñinollena, nagarui conini omoi comeciaina ocuiñota. Omoimona jeacinona ebiruiñellemona, jeacino anamo omoi iñellesa, birui Jusiñamui rafuena raise ñino. Jeacino anamo omoi dane jaia, Jusiñamui

rafuena ñnoñeitomoi. Iemona naimie riicaillafue anamo dane iitomoi. ¹⁴ Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiena cai nano ñnua isoi, cai ñnocana jaia, marena caimare iiticaí. ¹⁵ Ie jira naimiena ñno. Bie jaie cuega:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci cuega. Naimaci isoi iñeno.

¹⁶ Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise ñnoñedimaci. ¹⁷⁻¹⁸ Cuarenta años jofue iñenanomo itimaci; iadedi naimiena naimaci ñnoñena jira, Jusiñamui naimaci diga icirite. Naimiena ñnoñena jira, naimacimo Jusiñamui lloté: “Omoimo cue lloga eniruemo jaca jaiñeitomoi” lloté. Ie jira jofue iñenanomo naimacimo Jusiñamui jai lloga eniruemo jaiñeno fiodaitimaci. ¹⁹ Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciái jaca uri illana uiñoñedimaci.

4

¹ Jusiñamui ñibeimo raise cai illamona, Jusiñamui cai comeciái birui uri illana jitaide. Naimie lloga uai nia saiñede. Caimona damerie iese iñellesa, cai jaiagai isoi cai iñellena, abina rairuicana mai cai jailla. ² Jusiñamuidi comini comeciái uri illana jitaide. Cai jaiagaimo iena lloté. Diga icaiño naie mare rafuena cacadimaci; iadedi iena naimaci ñnoñena jira, iemona buena oñedimaci.

³ Jusiñamuidi cai comeciai uri illana birui caimo jai llote. Cristo ie mare rafuena jai cacadicaí. Naimie uaina cai ñnua jira, cai comeciai jai uri ite. Cai jaiagai comeciai uri iñede. Moisés micori cuiamona iena uiñoticaí. Cuega:

Naimaci diga Jusiñamui icirilla jira, naimacimo lloga eniruemo jaiñedimaci

Comeciai uri illana jaca uiñoñedimaci cuega. Jusiñamuidi nana comini comeciai uri illana jitaide. Eniruena naimie finocamo, comini comeciai uri illana jitaide. ⁴⁻⁹ Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci ñnoñena jira, naimaci comeciai jaca uri iñede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñnoñena jira, naimaci comeciai jaca uri iñede. Josué micori illa facaisemona diga años illanona, David micori comeciai uri illana jiai llote:

Naimie uaina birui omoi cacaia, iena ñno llote. Naiemona Jusiñamui cai comeciai uri illana jitaillana uiñoticaí. Naimiena ñnotinodicaimo naie rafue jai duide. ¹⁰ Jusiñamuina cai ñnuamona, cai comeciai jai uri ite. Cai comeciai uri illena, jiaie rafuedo jaiñedicaí. Naimiena cai ñnuamona,

naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

¹¹ Cai jaiagai inoñedimaci. Cai faifiñellena, naimaci isoi cai jaiñena; iadedi Jusiñamui uaina inocana mai cai jailli. Jusiñamuina cai inuamona, naimiedi cai comeciai uri itatate. ¹² Naimiena cai inoñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaino riire baite. Eo jairede lloebi bue isoide jaitaia, iena oni econu- anona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate. ¹³ Jusiñamuimona buna reirinide. Jusiñamui nana caina ciode. Nana cai finoca rafuena uiñote. Nana cai comeciaino iticinona uiñote. Ie jira naimie uaina inocana mai cai jailli

Jesúdi cai facaina Jusiñamui diga nanoca ñairaima

¹⁴ Jesúdi naie uaina cai inuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena inocana jaiticaí. ¹⁵ Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie inoñede. Iemona Taife ramo faiacinona inoñenana naimie uiñua jira, jeacinona oñede. Caina canorede. “Naimacina cano” ie Moomo llocabite. ¹⁶ Cai facaina ie Moo abimo naimie illa jira, cai comeciaina naimie ocuiñotaiacana jira,

Jusiñamuina jaciruiñoeno naimiemo cai jia. Naimie caina duenailamona, cai jeacinona feitaite. Cai comeaiaina jiai ocuiñoataite.

5

¹ Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñoeno jai ñaiticai. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaima Jusiñamui diga ñaite.

² Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuise canorede. ³ Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

⁴ Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí. ⁵ Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie ciegafuiaimona iena uiñoticaí. David micori Jusiñamui lluana jaie ciega:

Cue Jitodio. Jai o Moodicue

cuega. ⁶ Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

7 Eniruemo Cristo ia, ñimana naimie jailla jira, duere sefuide. Naimie fiodaiacana iairei ia, Jusiñamuimo eo jüide. Naimie fiodaiñena Jusiñamui jillotarede; iadedi Jusiñamuimo ado llote: “Cuenta legi cacaitaño; iadedi cue comeci jitailla isoi finoño. O comeci jitailla isoi fino” llote. Jusiñamui uaina naimie raise ñinua jira, Jusiñamui naimie jüana cacajano fairiote. 8 Naimiedi Jusiñamui Jito; iadedi Jusiñamui naimiena legi cacatate. Iemona Jusiñamuina ñinocana jaca jaillana naimie uiñote. 9 Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena ñinotinona jillotaite. 10 Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca sañena jira, naimie ifomo illena, jaimiena jaca fetofede. Ie isoi Jesús uai jaca sañede.

Cristo ñibeimona abido danomo jaiño

11 Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeciai iena raise jitañena jira, omoimo iena raise llonidicue. 12 Cristo rafuena are omoi cacaja jira, iedo omoi raise jaidomoidena, llofuerañina jaidomoi; iadedi iedo nia raise omoi jaiñena jira, jaimie omoina llofuiana nia jitaidomoi. Cristo ñibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena ñinocana nia raise jaiñedomoi. Eo janorede janosa monoijina jitaicabide. Einamac i soi guillena

nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonaita. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi. ¹³ Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñoñede. Jusiñamui jitailla isoi marecinona finuana nia uiñoñede. ¹⁴ Guilledí moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiaí uiñote.

6

¹ Diga icaiño bie rafuena jai cacadomoi. Cristona nano cai cacaja rafuena raise cai ñnuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo dibeimo caina itatañede rafuedo navui jaidicaí; iadedi cai comeciaí iuai birui jai meidoticaí. Cristo dibeimo itatate rafuedo birui jaidicaí. Jusiñamuina ñnuamona, naimie dibeimo jaidicaí. ² Cristo dibeimo bautizajana jai uiñoticaí. Llofueraimana jaillena fetuana jai uiñoticaí. Creyentiaina naimaci sedallena, naimacimo cai onolli jonianona, Jusiñamuimo cai jñanona, naimaci fetuana jai uiñoticaí. Nana creyentiaí fiodaillamona jilluana jai ñnoticaí. Jusiñamuidi naimiena ñnoñedinona ico jaca duere finollena jai ñnoticaí. ³ Naie isoide rafue mare; iadedi iena cai raise ñnuamona, Jusiñamui jitailla jira, naimie caina canuamona, jiaie Cristo rafuena

fueocana mai cai jailli. ⁴ Uanaicinona omoi comeciai uiñuamona, Cristona omoi ñnuamona, Jusiñamui Joreño omoi mo illamona, ⁵ Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai. ⁶ Cristo ðibeimona omoi mona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fiodaillana jai jitaiñede. Cristona jeare jai finode. Cristo finoca rafuena jamaide. Cristona naimie jitaiñenia, ¿ñiese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. ⁷ Ero, iena jiaie rafuedo lloiticue. Jusiñamui noci deitacabilla jira, enirue naimie raitacabilla jira, iemo riará sicuanona, iena ie nama raitia, naiemona ie llisillana naimie uamona, Jusiñamui iobide; ⁸ iadedi naie eniruemona riará sicoñenia, maraiñede. Monaigi cuirai o diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fañonocaide. Naie enirue isoidomoi. Jusiñamuimona mare rafuena cacadomoi. Iena ñnocana omoi jaia, naimie omoi na iobitaite. Iena omoi jitaiñenia, naimiemona duere sefuitomoi.

Jusiñamui llua jira, cai comeciai ocuiñocana jaidicai

⁹ Cue isiruigaomoi, abi rairuillicinona omoi mo lloticai; iadedi cai llofuiacino omoi mo ðuiñenamo cai comeciaina facañedicai. Cristona ñnocana omoi jaillamo cai comecina facadica. ¹⁰ Jusiñamui

omoi na raise uiñote. Naimiena omoi isiruillamona, jiaie creyentiana omoi isiruillamona, naimacina navui canodomo. Naimacina nia canodomo. Ie jira naimiemona duere sefuiñeitomo.

¹¹ Omoi comeciainona jiaie creyentiana omoi canua isoi, Cristo rafuedo nana omoi ille dinori ñnocana omoi iocire jaillana jitaídica. Naimie diga ico jaca omoi ille jira, iese omoi jaillana jitaídica. ¹² Cristo rafuedo omoi jaillamona omoi sefuiruiñenana jitaíñedica. Jusiñamui lloga uaina ñnocana jaidino isoi, omoi jaillana jitaídica. Naimiena naimaci ñnuamona, naimie lloga uai fecuise naimaci ocurillanona, naimie lloga uaina oitimaci. Naimaci isoi omoi jia, naimie lloga uaina jia oitomo.

¹³ Ero, Jusiñamuidi Abraham micorimo lloga uaina uiñotomo. Naimiedi Jusiñamuina jira, uanaicinona llote. Tainona lloñede. ¹⁴ Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaina eojebuitaiticue” llote. ¹⁵ Abraham micori naimie lloga uaina ñnote. Iena suillemo fecuise ocuride. Ie jito Isaac micori, Jusiñamui llua isoi, comuide. ¹⁶ Uanaicino cai llocabillana jiaie comini uiñollena, Jusiñamui mamecina lliñotica. “Jusiñamui caina cide” llotica. “Uanaicinona cai lloñenia, Jusiñamui caina duere finoite” llotica. Ie jira cai lloga uaina buna uaitañede. ¹⁷ Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uiñuana naimie jitaide. ¹⁸ Naimiedi Jusiñamuina jira, ie uai naimie jai llua jira, naimie tainona llonillana uiñotica. Ie jira naimie lloga uai naimie finuana

uiñoticaí. Naimiena cai ñnuamona, naimie anamo cai illa jira, caína naimie eenua jira, cai comeciaí ocuiñocana jaidicaí. Naimie illanomo ico cai jaca illemo ocuridicaí. ¹⁹ Naie rafuena Jusiñamui llua jira, cai comeciaí ocuiñocana jaidicaí. Ie lloga uaina naimie finollemo ñnoticaí. Monamo Jusiñamui illanomo ico cai illena eo raise uiñoticaí. Nainomo fiebillena, barco ie lloelluna illemo dotaja isoi, cai comeciaí naganomo iñellena, Jesús caína eenote. ²⁰ Jesús nainomo jai illa jira, naimie muidona nainomo jiaí iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

7

Melquisedec micori illa isoi, Jusiñamui diga ñairaimana Jesús jaide

¹ Iena omoí raise uibiñollena, Melquisedec micori rafuena omoímo lloiticue. Naimie micoridi Salem railla nairai ie illaíma. Naimiedi comini facaina cai Moo Jusiñamui diga ñairaima. Cinco illaímana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñotique” llote. ² Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaímana anafetitajanona, naimaci rana bairuanona, nana naie ramona, riaí uaimona ie décima facaina rana Melquisedecmo fecade. Melquisedec micoridi

Salem railla nairai illaïma. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. ³ Naimie moona, naimie eina, naimie cominina uiñoñedicaï. Naimie jeiciaruina uiñoñedicaï. Naimie fiodaillaruna uiñoñedicaï; iadedi Jusiñamui Jito isoi Jusiñamuimona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

⁴ Ero, cai cominimona Abraham micori cai jaiagai baiñemo faite; iadedi Melquisedec micori Abraham micori baiñemo faite. Ie jira naimiemo ie décima facaina rana fecade. ⁵ Moisés micorimona Abraham micori uruiaï Jusiñamui lloga uaina cacadimaci. Naimacimo Jusiñamui ie sedaja jofu finuana llote. Nainomo maijidinomo nainomo maijiana llote. Abraham micori uruiaïmona Leví railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona décima facaina rana feiñouidimaci. ⁶ Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona llote: “Jusiñamui ona jaca canoite. O diga jaca iite” llote. ⁷ Melquisedec micori Abraham micori baiñemo faia jira, naie marecinona naimiemo llote. ⁸ Ero, Melquisedec micorimo Abraham micori rana fecade; iadedi

Melquisedec micorí fiodaillaruína uiñoñedícaí. Naimíe uai saíñena jira, jáimíe naimíe ifomo jaca íñede. Comíní facaina Jusiñamui díga ñairainímo naimací ramona décima facaina caí judíuái comíní dí fecauídímací; ía naíe ñairainí fiodaicana jaillana uiñotícaí. Naimací uai sailla jira, jáino naimací ifomo meidouídímací. ⁹⁻¹⁰ Leví micorí dí Abraham jito. Leví micorímona Leví railla nairáí comuíde. Naimací dí Jusiñamui díga ñairainína jaídímací. Comínímona décima facaina rana feíñouídímací. Leví micorí nía comuíñenia, Melquisedec micorímo Abraham micorí décima facaina rana fecajamona, Abraham micorí Leví íe usumana jira, Melquisedec micorí dí Leví nairáí baífemo faiana uiñotícaí. Melquisedec micorí dí Jusiñamui díga ñairainí baífemo faiana uiñotícaí. Melquisedec ísoí Cristo ílla jira, Cristodí Leví baífemo faiana uiñotícaí. Cristodí nana naíe ñairainí baífemo faiana jáí uiñotícaí.

¹¹ Jusiñamui díga ñairainí finouilla rafuedo Jusiñamui jitailla ísoí marebicáíñedícaí. Naimací finouilla rafuedo caí jillobidícaídena, jáíe rafuena jitaíñedícaí. Naíe rafuedo caí jillobíñena jira, Jusiñamuidí Cristona orede. Caí facaina Cristo ñairáimana jaillena, naimíena orede. Caína jillobitallena, naimíena orede, jáíe rafuedo caí jillobíñena jira. Jusiñamui Moisés micorímo jáíe llua ísoí, comíní facaina nano ñairáimadí Aarón micorí. Naimíedí Leví railla nairáí ímíe. Naimíe jitoníaímona comíní facaina ñairainína ítímací. Iena uiñotomoi. Aarón jitoníaímona Cristo íñede. Aarón maíjía rafuemo Cristo dúíñede; íadedí Melquisedec rafuemo dúide. ¹² Comíní facaina

ñairainina jaillana jai meidua jira, Jusiñamuidi naimaci rafuena jiai meidote. ¹³ Iena lloiticue. Aaróndi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. ¹⁴ Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jaie jaca lloñede.

¹⁵ Cristo billa jira, Moisés micori lloga rafue meiduana uiñoticaí. Melquisedec micori illa isoi, comini facaina ñairaimana Cristo jaca iite. ¹⁶ Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide. ¹⁷ Jusiñamui lloga uaimona iena uiñoticaí. David micori naimiena jaie cuega:

Melquisedec micori illa isoi, odi comini facaina ñairaimana jaca iitio cuega. ¹⁸ Comini facaina ñairaimana jaillana Moisés micori jaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci. ¹⁹ Naiedo jaillamona, Jusiñamui jitailla isoi marebicaiñedicaí. Iedo birui jaiñedicaí. Jiaie rafuemo birui ocuiridicaí. Cristo finoca rafue muidona, Jusiñamuina cai nabaillamona, Jusiñamui diga birui ñairedicaí.

²⁰ Jusiñamui llua jira, Cristo cai facaina

ñairaimana jaide. ²¹ Leví micorí jitoníaidi imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetoñede; iadedi ie lloga uaina jira, Cristo cai facaina ñairaimana jaide. David micorí Jusiñamui lluaña jaie cuega:

Cue jai llua jira, cue lluaña finoitícue.

Cristomo llotícue: “Comini facaina ñairaimana jaca iitío”

cuega. ²² Jesús ñairaimana jaca illa jira, naimie jailla rafue Moisés micorí lloga rafue baifemo uaide. ²³ Moisés micorí lloga rafue anamo ailluena ñairainídi itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena. ²⁴ Naimie jaca illa jira, Cristo ñairaimana jaca iite. Naimie ifomo jaca buna meidoñeite. ²⁵ Naimie jaca illa jira, comini facaina Jusiñamui díga jaca ñaicabite. Ie jira Cristodí nana Jusiñamui díbeimo iacadinona, naimaci jeacinomona, ua jaca jillotarede. ²⁶ Caina canollena, naimie isoide nanoca ñairaimana jitaídicaí. Ie Moo isoi naimiedi mareuidimie. Naimie mo jeacino jaca iñede. Jeacino finouidino díbeimo naimie iñede. Jusiñamuidi ie ecimo naimiena itatate. Ie jira naimie caina canorede. ²⁷ Jusiñamuimo fecallena, naimaci jeacino facaina naimie iba oñellena, Moisés micorí llua isoi, nanoca ñairainídi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiaí finodimaci. Cristo naimaci isoíñede. Naimie jitailla jira, comini jeacino facaina naimie fiodailla jira, comini facaina dacaiño fiodaite. Naimaci jeacino

facaina naimie dane fioldaiñeite. ²⁸ Moisés micori facai ñairainidi jeacinona finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

8

Cristo muidona jiaie rafue birui ite

¹ Cristomo ite rafuena lloiticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ² Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite. ³ Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fioldate. ⁴ Moisés micori jaiie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵ Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaiie niacania, Jusiñamui naimiena llofuate: “Monamo iticue; ia cue jofu eniruemo jiai finoitomoi. Sinái railla anedu navui o ia, ona llofueticue. Ona cue llofuia

isoi, cue jofona fino” llofuate. ⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. ⁷ Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micori lloga uaina cai jaiagai ñnoñena jira, Jusiñamui jai llote:

Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canu-
anona, naimacina atidicue;

iadedi Moisés micorimo cue lloga rafuedo
jaiñedimaci.

Ie jira naimacina fañonocaidicue.

¹⁰ Naimacimo jiaie rafuena ico jiairuido lloiticue.

Iena naimaci uiñuamona, cuena raise ñnoitimaci.

Naimaci Jusiñamuidicuenta jira, naimaci cuena
sedaitimaci.

Cue anamo raise naimaci illa jira, cue
comininitimaci.

¹¹ Nana naimaci cuena uiñoitimaci.

Ie jira naimacimo: “Cai Namana omoi ñno” buna
niese lloñeite.

Jamai bue isoidinomona cuena ñnoitimaci.

Jamai bue isoñedynomona cuena jiai ñnoitimaci.

¹² Naimacina cue duenailamona, naimaci
jeacinona jaca feitaiticue

llote. ¹³ Jiaie rafuena Jusiñamui jai llumona, Moisés micorimo lloga rafue jai saillana uinoticaí. Moisés micorí lloga rafue caimo jai duiñede. Cristomona jiaie rafuena birui jai cacadicaí.

9

Hebreos comini Jusiñamui jofona eniruemona jai nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorimo diga rafuena jai llote. Naie rafuemona cai fueollena, iena lloiticue. Naimiena sedajana llote. Naimie sedalle jofu finuana jiai llote. ² Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofu jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce lloimenico joide. ³ Mena cuartos illena iniroina sebiñoga. Naie baifemo iticuartodi Jusiñamui illano. ⁴ Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micorí jiguida nainomo jiai ite. Jusiñamui uaido naie jiguida dacaiño llisilla jira, nainomo ite. Jusiñamui cuega nofici ibici jiai ite. ⁵ Cajón emodo ibaillabicidi ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie

motomo Jusiñamui quenirena baireuide. Naie rafuena raise omoï jaï uiñua jira, iena omoïmo are lloñeiticue.

⁶ Naie isoide rana finodimaci. Iemei Jusiñamui diga ñairainimona damerie nano fo jailla cuartomo nagarui jaidimaci. Moisés micori lua isoi, nainomo ite rafuena finollena, iedo jaidimaci. ⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabícimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenailamona, Jusiñamui naimaci jeacino facaina ibana oñede. ⁸ Jusiñamui Joreño caina llofuiamona, biena birui uiñoticaï. Naie jofonia ia, jamai comini fo jainina jira, Jusiñamui diga, cominidi atona nabairinidimaci. ⁹ Bie rafuena birui nia finodimaci. Moisés micori lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naimona naimaci comeciaina raise finonidimaci. ¹⁰ Jusiñamuina naimaci raise sedallena, Moisés micoridi diga guille fimaide. Jiruana jiaï fimaide. Naimaci abiaina finollena jiaï llote. Nie isoide guille, nie isoide jirolle, niese naimaci abiaï finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaïe rafue birui ite.

¹¹ Moisés micori finoca jofomo Jusiñamui dine

Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicai. Cai comeciai raise jai finobide.

¹² Naimie fiodailla mei, dane jilluanona, Jusiñamui dine monamo naimie abide jaide. Toiniiai diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate.

¹³ Maraiñede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toiniiai diailla mei, jobaide toiniiai ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede.

¹⁴ Toiniaina fañeno Jusiñamuina birui sedadica. Cristo fiodaiacana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade.

¹⁵ Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina ñnotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiena bu ñnoia, naimie jeacino facaina Jusiñamui birui ibana oñeite. Nana

Jusiñamuina ñnotinodi naimie jai llua isoi, naimie diga jaca iitimaci.

¹⁶⁻¹⁸ Jusiñamui jofo jaie finua mei, Moisés micorimo Jusiñamui llote: “Cue lloga rafuena raise finodomoí. Bie jofomo cuena sedallena, faga toiniaí dirue diga bie jofona llereca. Nana naiemo ite rana jiaí llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fodailla jira, Jusiñamuimona birui jiaie rafue caimo ite. Cristo diailla jira, Cristo fodaillamona, bie rafue jai tainede. Bie rafuedo cai jaillamona, cai jeacinomona jai jillobidicaí. ¹⁹ Ie cominimo nana naimiemo Jusiñamui lloga rafuena Moisés micorí llua mei, faga jurareta dirue diga, faga chivo dirue diga, nana naie lloga rafue cuebasiaina llerede. Cominina jiaí llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede. ²⁰⁻²¹ Jusiñamui jofona dirue diga llerede. Nana nainomo ite rana jiaí llerede. Llote: “Jusiñamui llua isoi, buena finodicue. Naimie llua jira, bie dirue illa jira, naimie caina duere finoñeite”. ²² Moisés micorimo Jusiñamui llua isoi, raise finobillena, nana rana dirue diga llerede. Toiniaí fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

Cristo fodailla jira, Jusiñamui cai jeacinona oni dotade

²³ Jusiñamuidi Moisés micorimo toiniaina fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi

Cristo fiodaillana jitaide. Cristo fiodaillafue faga toiniái baifemo faia jira, monamo cai jaca illena, jeacinona oni dotallena, Cristo fiodaite. ²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵ Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoiñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite. ²⁶ Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite. ²⁷ Nana dacaiño fiodaiticai. Iena uiñoticaí. Fiodailla mei, Jusiñamui uicomo iiticaí. Naimiena cai inoia, caina feiñoite. Naimiena inoñedinona duere finoite. ²⁸ Dacaiño Cristo jai fiodaillana uiñoticaí. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritina monamo Jusiñamui illanomo uite.

10

¹ Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñoticaí. Jusiñamui cai jeacino oni dotajana uiñoticaí. Jusiñamui jaca mareuidimiena uiñoticaí.

Jusiñamuina nabaillena janore uiñoticaí. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicaí.

² Naie faga toiniaí Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. ³ Naiena fecauillamona, jeacinona finocana naimaci nia jaillana uiñotimaci. ⁴ Toiniaí dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate. ⁵ Eniruemo jaie billanona, Jusiñamuimo iena Cristo llote:

Jeacino facaina toiniaí fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitañedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriaí iena jaie cuetimaci

llote. ⁸ Cristo lluana dane ñaiticue. Cristodi Jusiñamui Moisés micorimo llogacinona ñaite.

Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena

Jusiñamui birui jai jitañede. ⁹ Cristodi: “Jusiñamui jitailla rafuena finuaibiticue” lluamona, Moisés micorimo llogacino jai saillana uiñoticaí. Jiaie rafue birui illana jiaí uiñoticaí. ¹⁰ Jusiñamui jitailla

jira, Jesucristona orede. Cai facaina naimie fiodaillena naimiena orede Jesucristo ie Moo

jitaillacinona finuamona, cai jeacinomona jai jaca jillobidicai. Jai marebicaidicai.

¹¹ Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede; ¹² iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide. ¹³ Nana naimie dibeimo iñedinona naimie emodofillemo naimie birui ocuride. ¹⁴ Dacaiño Cristo fiodaillamona, naimiena cai ñnuamona, Jusiñamuimona jaca marebicaidicai. ¹⁵ Jusiñamui facaina lloraima micori ciegafuemonona Jusiñamui Joreño caina iena uiñotade. Naimie facaina lloraima micori Jusiñamui lluaña jaie iese cuega:

¹⁶ Hebreos cominimo jiaie rafue ico jiairuido lloiticue.

Cue rafuena naimaci uiñuamona, cuena raise ñnoitimaci.

¹⁷ Jiai cuega:

Naimaci jeacino jaca feittaiticue.

¹⁸ Cristo jai fiodailla jira, jeacinona Jusiñamui jai feittaja jira, faga toiniaina naimiemo fecajana dane jai jitañede.

Jusiñamuina cai nabailli

¹⁹ Cue amatiai, Jesús fiodailla jira, Jusiñamuina jaciruiñeno birui nabairedicai. Naimie cai Moo jai illanona, naimie diga meiruiñeno jaciruiñeno birui jiai ñairedicai. ²⁰ Moisés micori facaise nanoca ñairaima fo iticuartomo jaillena, sebiñoga iniroi oni dibeimo jaidimaci. Iese Jusiñamui illanomo

ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicai. Naimie diga birui atona nana ñairedicai. ²¹ Cristona jai cai ñnua jira, cai facaina nanoca ñairaimana naimie illa jira, ²² cai mare comeciãmona Jusiñamui diga birui cai ñailli. Naimiena eo cai ñnuamona, cai comeciã jeanillamona, naimie dibeimo cai bautizajamona, naimiena mai cai nabailli. ²³ Cristo caina jilluana ñnoticai Monamo naimie diga cai illemo ocuiridicai. Jusiñamui ñnogamiena jira, naie rafuena ñnocana mai cai jailli. ²⁴ Jiaie creyentiaimo cai comeciãina cai facaja. Conini cai isiruitacana cai jailli. Conimo cai mare rafue finocana cai jailli. ²⁵ Rollena omoimona damierie oficabiñedimaci. Naimaci isoi omoi iñeno; iadedi Jusiñamuina sedallena oficabi. Abido omoi danomo jaiñellena, conini comeciãina ocuiñotallena, oficabi. Jesucristo abido billirui iaiei illa jira, naimiena raise ñnollena, conini omoi comeciã ocuiñocana mai omoi jai.

²⁶ Cristo finoca rafuena bu uñua mei, iena naimie ñnoñenia, jeacina naimie finocana jailla jira, Jusiñamui naimie jeacina feitañeite. Cristo fiodaillana bu jamaia, Jusiñamui ie jeacina feitañeite; ²⁷ iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo iñedina duere finoite. ²⁸ Moisés micori jaie cueda: “Jusiñamui llote: ‘Menamie naimiena daje isoi lloillamona, Moisés micori llogacina jamaidimiena dueruiñeno meinea’ ”. ²⁹ Iese duere sefuillana jaie llote; iadedi birui ite lloga

rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fiodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena ñnotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite. ³⁰ Ero, Jusiñamui jaie llote: “Maraiñedinona bu finoa, ìbana oiticue. Cuen a ñnoñedinona duere finoiticue” llote. ³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi ññellena, Jusiñamui lloga rafuena jamaiño.

³² Creyentiaina nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona ñnocana jaidomoi. ³³ Omoimona damerie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci. ³⁴ Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedino omoi rana bairodimaci; iadedi omoi comeciaina iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. ³⁵ Jusiñamuimona ìba ìco omoi feiñua jira, Cristona ñia ñnocana omoi jai. ³⁶ Jusiñamui jitaillacino omoi finollena, monamo jaca omoi illena, ñie isoide ramo omoi jiria, Jusiñamuina ñia ñnocana

omoi jai. ³⁷ Jusiñamui buena llua jira, iese suite: Cristo abido billirui iairei illa jira, naimiena #nocana omoi jai.

³⁸ Naimie nia abido biñenia, omoina cue jai marebicaitaja jira, cuena #nocana mai omoi jailli;

iadedi cuena jitaiñedinori iobiñedicue.

³⁹ Naie isoidino jillobiñeitimaci. Naimaci isoi iñedicaí. Jusiñamuina #nocana cai jaillamona, jaca jillobidicaí. Ie jira naimiena #nocana mai cai jailli.

11

Jusiñamuina #nocana jaidicaí

¹ Jusiñamuina cioiñedicaí; iadedi naimie illana #noticaí. Naimie lloga uaina #nocana jaidicaí. Naimie lloga uai suillena #noticaí. Ie lloga uai suillemo ocuridicaí. ² Cai jaiagai mona damierie iese #nocana jailla jira, Jusiñamuimona marebicaidimaci. ³ Jusiñamui finoca rana birui ciodicaí; iadedi jaie nano dofoconi jaca buena iñede. Naie facaiseconi dama ie uaido Jusiñamuidi eniruena finode. Mona finode. Nana rana finode. Nana rana comuitate. Iena #noticaí.

⁴ Cai jaiagai rafuena ja lloiticue, naiemona cai fueollena. Abel micori Jusiñamuina jaie #nuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise #noñena jira, naimie fecaca rari iobiñede. Iena feiñoñede. Abel micori Jusiñamuina #nua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise #nollena, naimiemona nia fueoiticaí.

5 Enoc Jusiñamuina jaie ñnote. Naimiedi Jusiñamuina eo iobitate. Moisés micori ciegafuiaimona iena uiñoticaí. Jusiñamuina ñnuamona, Jusiñamuina eo iobitaja jira, naimie fioldaiñede; iadedi fioldaiñeno monamo Jusiñamui naimiena naimiena uite. 6 Jusiñamuina cai ñnoñena, naimiena iobitañedicaí. Jusiñamuina cai nabaiacania, naimiena cai raise sedaacania, naimie illana ñnoticaí. Naimiena cai nabaiacania, cai jítai raillano, caína canollena ñnoiticaí.

7 Noé micori Jusiñamuina jaie jiaí ñnote. Jusiñamui ico suille rafuena naimiemo llote. Enirue buillena llote. Iena ñnuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui lluana Noé micori ñnua jira, jillode. Noé micori Jusiñamui lluana ñnote; iadedi naimie facaise ite comini ñnoñena jira, Jusiñamui riicallafue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micori marebicaide.

8 Abraham micori Jusiñamuina jaie jiaí ñnote. Ie moo eniruemonona naimie jaiannillena Jusiñamui naimiemo llote. Are ite eniruemo naimie jaiannillena llote. “Jiaie enirue omo iiticie” Jusiñamui llote. Abraham micori ñnote; iadedi ie jaillinona uiñoñede. 9 Jusiñamui lloga eniruemo Jusiñamuina ñnocana jaide. Naie eniruemo ride; iadedi naie enirue naimiemo nia raise duiñede. Chivo itiraímona niga ñniroimona sebiñoga jofomo naimie jaca ite. Ie jito, Isaac micori, naie isoide jofomo jiaí ite. Isaac micori jito, Jacob micori, naie

isoide jofomo jiaí ite. Jusiñamuidi nana naimacimo daje isoide rafuena llote: “Bie enirue omoimo iiticue” llote. ¹⁰ Abraham micori mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

¹¹ Abraham micori aidi Sara micori. Jusiñamuina Sara micori ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiñomo Jusiñamui llua isoi, naiñaiño uruesillana ñnote. ¹² Abraham micori jiaí eo jionaide; iadedi jitona comuitate. Naimie jitomona naimie nairaí eo jebuide. Facadonide ucuaí isoi jebuidimaci. Facadonide conillie isoi jebuidimaci. Ailluena ucuaí illa jira, naimaci facadonidicaí. Ailluena conillie illa jira, iena facadonidicaí. Ie isoide. Eo ailluena Abraham micori uruiaí illa jira, naimacina facadonidicaí.

¹³ Abraham micori, Isaac micori, Jacob micori Jusiñamuina ñnocana jaidimaci. Nana naimacimo Jusiñamui lloga uaina suiñedemo fiodaitimaci. Nia fiodaiñenia, Jusiñamui llogacinona cacadimaci. Iena ñnotimaci. Ie jira bie eniruemo naimaci jaca illemo comecina facañedimaci; ¹⁴ iadedi monamo jaca illemo comeciaina facadimaci. ¹⁵ Naimaci jaie billa eniruemo comeciaina naimaci facadena, nainomo abido jaidimaci; ¹⁶ iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui

naimaci illinona jai finode.

17-18 Jusiñamuina Abraham micori ñnua jira, ie jitona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micori naimiena ñnuana raise uinollena, facacite. “O jitona fano” Abraham micorimo llote. Abraham micori Jusiñamuina ñnuanona, ie jito faiacade. 19 Ie jito fiodablemona, Abraham micoridi Jusiñamui naimiena jilloitallena ñnote. Isaac micori fioldañede; iadedi fajamona jillode.

20 Isaac micori Jusiñamuina jiai ñnote. Naimie fioldaiacania, Jusiñamui ie llogacino finollena ñnuamona, mena ie urue iaïmaïamo ie uaina fecade. Llote: “Jusiñamui llua isoi, jebuicana jaitomico”. 21 Jacob micori Jusiñamuina jiai ñnote. Naimie fioldaiacania, Jusiñamuimo jianona, ie jiguidamo juita naidaidemo, José micori ie mena urue iaïmaïaïamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomico. Naimie omicono canoite” llote. 22 José micori fioldaiacania, ie cominimo llote: “Jusiñamui omoïna canuano, Egiptomona ico jairuido omoï jaïllena ñnoticue. Omoï jaïa, cue illaïciaïna omoï diga uïño. Canaán raïlla eniruemmo omoï ria, nainommo cue illaïciaïna raïno”.

23 Moisés micori moo, ie ei diga Jusiñamuina jiai ñnotiaïmaïaï. Hebreos comini jebuiñellena, naie facaiseconi Egipto illaïma nana hebreos ñsaïaïna meiniana llote. Iaïmaïaï jito jeicia mei, iaïmaïaï uruena daje amani fivui reidïaïmaïaï. Jusiñamuina ñnuanona, naimie maresana

eruailla jira, jaciruiñeno naimiena jofomo fo reide. Illaima llumona Jusiñamui naimiena jillotajana ñnotiaimaia. Ie jira Faraón jisa anamo comuide. Faraón di Egipto nairai illaima. ²⁴ Moisés micori Jusiñamuina ñnote. Naimie eimienamona, naimiedi Faraón jisa ie jitona mamecireacaiñede; ²⁵ iadedi naimiedi Jusiñamui naimiena ie cominina Egiptomona jillotajana ñnote. Jusiñamui naimie fetua jira, ie comini ñibeimo naimie iacade. Ie comini ñiga duere sefuiacade. Jusiñamuina ñnoñedino ñiga ie comeci jamai iobitaiacaiñede. ²⁶ Faraón jisa anamo naimie comuilla jira, naimiemo eo aillue rana ite; iadedi Egiptomo ite ebirede ramo ie comecina eo facañede. Jusiñamuimona ñba naimie ñco feiñoiacana jira, Jusiñamui Jito billemo ie comecina facajano, duere sefuide. ²⁷ Ie jira Egiptomona Moisés micori Faraóna jaciruiñeno oni jaide. Jusiñamui naimiena eenuana ñnote. Jusiñamuina ñioiñede; iadedi Jusiñamui illana naimie ñnua jira, ñnocana jaide.

²⁸ Jusiñamui ie cominina jillotajana Moisés micori ñnua jira, Jusiñamui llua isoi, pascua railla rafuena finode. Ie cominimo toica llauda fallena llote. Ie ñirue nase fuemo jidellena llote. Naie naio Jusiñamui jaienicí nana nano doforanina meinesañellena, Jusiñamui lluana finodimaci. ²⁹ Egiptomona naimaci billa mei, jiairede railla monailai ruica ñine jaillena, Jusiñamuina ñnotimaci. Jusiñamui Moisés micorimo lluana naimaci ñnuamona, jñnui motodo saferedifodo ruica jaidimaci; iadedi Egipto soldaduai daje isoi ruica jaiacadimacimo, nana corobaitimaci.

³⁰ Canaán railla eniruemo hebreos comini rilla mei, Jericó railla nairai dine ridimaci. Jusiñamuina ñnuanona, Jusiñamui llua isoi finodimaci. Siete digarui Jericó ecimo naimaci macarilla mei, Jusiñamui llua isoi, naie llaigafo ana bijide. Naie nairaina emodofidimaci. ³¹ Naie facaiseconi Jericómo Rahab micori fiodaiñede. Naiñaiñodi callirediñaiño. Nana Jericó comini Jusiñamuina ñnoñena jira, fiodaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comini iaiaiana naiñaiño feiñua jira, Jericó nairaina emodofilla facaise naiñaiñoña meineñedimaci.

³² Diga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefté micori, David micori, Samuel micori Jusiñamui facaina jaie llorainina jiai eo cueñeiticue. ³³ Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaíma isoi jiaíno naimaci cominina raise marena sedadimaci. Jusiñamui llogacino suillana cidimaci. Leones naimacina riacanamona damierie jillode. ³⁴ Iraimo usillamona damierie jillodimaci. Lloebi diga meiniamona damierie jillodimaci. Jiaíno jamai bue isoidino; iadedi jamai bue isoíñedinona jaidimaci. Jobaime raise finuamona, jiaíno imaci bacauai soldaduina judaisitade. ³⁵ Dañaiñorie riñoniaimona uruiai fodailla mei, fodaillamona Jusiñamui

damieriena jillotate. Illaicominimona jiaino duere fiodaitimaci. Jusiñamuina fainonocaiacaiñena jira, naimacina meinetimaci. Naimaci fiodaiacania, monamo Jusiñamui diga ico jaca illena naimaci inua jira, Jusiñamuina fainonocaiñeno fiodaitimaci. ³⁶ Jiaino duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damieriena maianona, cárcelmo jonetimaci. ³⁷ Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaino buenidimaci. Naimaci iniroi jamai igoi ie. Dueredimaci. Naimaci iniroi raise iñede. Aime guisoidimaci. Jiaie cominimona duere sefuisoidimaci. ³⁸ Jiaie cominimona jamai bue isoidimaci; iadedi Jusiñamuimona jamai bue isoñedimaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai biita inuidimaci. ³⁹ Jusiñamuina inocana jaidimaci. Naimaci finoca rafuemono Jusiñamui comini naimaci illana uiñotici. Jusiñamuina inotimaci; iadedi nana naimacimo Jusiñamui lloga rafue naimaci illa facaise suiñede. ⁴⁰ Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jai jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

12

Jesús finoca rafuemo cai comeciaina cai facalli

1 Cai jaiagai Jusiñamuina ñnocana jaillana uiñoticaí. Ie jira caidi naimaci isoi, Jusiñamuina ñnocana birui mai cai jailli. Marena riire cai aisiacania, ailluena rana abiñedicaí. Ie isoide. Jeacinona cai finoñellena, naimiena raise cai ñnollena, jeacino finuacínona mai cai fainonocaili. Nie isoide rafue camo ia, Jusiñamui jitaillacinona finocana mai duere cai jailli. 2 Jesús finoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuiñotajanona, Jesúsna ñnoticaí. Cruzmo marañedimie isoi fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúsno cai comeciaina facajamona, camare mai cai jailli. 3 Jusiñamui ñbeimo ññedinomona Jesús eo duere sefuide. Ie isoi cai duere sefuia, Jesúsno cai comeciaina facajamona, cai comeciaina ocuiñotacana mai cai jailli. 4 Jusiñamui ñbeimo ññedinomona duere sefuillamona, Jesús isoi duere nia sefuñedomoi. Omoína nia meineñedimaci. 5 Duere omoi sefuia, bie jaie cuezafuiaina feitaño. Naimie cominina omoi illamona, Jusiñamui llote:

Cue uruiaí, omoína cue duere finoia, cuena nia ñno.

Duere sefuillamona, cuena fainonocaiño.

6 Omoína cue isiruillamona, omoína duere finodicue.

Cue ñbeimo omoína raise itatallena, omoína duere finodicue.

Nana cue cominina cue llofuecabillamona, naimacina duere finodicue llote. ⁷ Naimie jitaillacinona cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillacinona finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillacinona cai finollena, caina duere finocabide. ⁸ Caina inotallena, Jusiñamui caina duere finoñenia, naimie cominiñedicaí. Naimiedi nana ie cominina duere finocabide. ⁹ Cai eniruemo ite cai mootiai caina duere finoia, naimaci uaina inoticaí. Ie isoide. Cai Moo Jusiñamui caina isiruillamona, caina duere finoia, naimie uaina cai inua. Naimiena cai inuamona, monamo naimie diga ico jaca iticaí. ¹⁰ Naimaci comeciai llua isoi, cai eniruemo ite mootiai dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataiacade. ¹¹ Jusiñamuimona duere cai sefua, iena gaiñedicaí. Iena jitañedicaí; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

Jusiñamui rafuena cai cacai, iena cai aruiruiñena

¹² Nie isoide ramo caimo jiria: “Jusiñamui caina nibai canoñede” raiticaí. Iemona naimiena fainonocaiacadicaí; ia iemo cai comeciaina cai facañena. Jusiñamui rafuena cai sefuiruia, duere cai sefua, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise inuamona, cai comeciai ocuiñocana mai cai jailli. ¹³ Jiaie

rafuedo cai jaiñena; iadedi Cristo rafuedo raise ñnocana mai cai jailli. Iese cai jaia, Cristo rafuedo naimaci jiai raise raise jaillena, jiaie creyentiaina canoíticai. ¹⁴ Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. ¹⁵ Jusiñamui caina duenaillamona, nana cominina jillotaiacade. Omoimona buna Jusiñamui duenaillacinona fainonocaillana jitañedicue. Omoimo iese suia, iemona conini gaiñenacino comuirede. Iena jitañedicue. Omoi comeciai daje isoi lloillana jitaidicue. ¹⁶ Jearede rafuena jaca finoñeno. Esaú micori jaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiодaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiодaiñena facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade. ¹⁷ Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiñeno.

¹⁸ Moisés micori facaise cai hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide.

Nainomo aifi eo ite. Eo boriuide. Eo gurude. ¹⁹⁻²⁰ Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toiniaí nainomo macaria, nofici diga fairinuamona, naimiena omoi meine” llote. Jusiñamui lluaana cacajamona, eo jaciruitimaci. Moisés micorimo: “Jusiñamui caimo nia lluaana jai jitañedicaí” llotimaci. ²¹ Eo jacirede ra illa jira, nana comini diga Moisés jiai jaciruite. ²² Sinaí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicaí. Monamo Jusiñamui ite; iadedi birui naimiena atona nabairedicaí. Cai fiodaia, naimie dne jaiticaí, naimie diga jaca cai illena. Nainomo ie jaienisaí naimiemo iobillacinona fecacabidimaci. ²³ Ailluena comini diga, Cristona birui inoticaí. Nana caina Jusiñamui fetuanona, cai mameciaí monamo ite rabenicomo jai cueda. Jusiñamui nana comini comeciaina uinote. Naimiena inotinomona ailluena jai fiodaitimaci; ia naimie ecimo naimaci joreñuaí jiai jai itimaci. ²⁴ Jesús fiodailla jira, Jusiñamuina nabairedicaí. Naimie fiodailla jira, caimo jiaie rafue birui ite. Naie rafuena cai inuamona, cai comeciái jai marena iticaí. Jiai cai jeacinona oni dotade. Iena jiai jai feitate. Abel micori jai fiodaia, naiemona Jusiñamui buna ie jeacinona feitañede; iadedi Jusiñamui Abel micori meinetimie mo ibana ote.

25 Ero, Jusiñamui rafuena omoï cacaia, iena jamaiñeno. Iena aruiruiñeno. Moisés micorï facaiseconi naie comini Jusiñamui lloga rafuena cacadimaci. Jiaïno iena jitaiñedimaci. Iena ñnoñedimaci. Ie jira Jusiñamui naimacina duere finode. Cristomona jiaïe rafue birui cacadicaï. Bie rafuedi Moisés lloga rafue bai femo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai ñnua. 26 Moisés micorimo ie rafue llua facaise, Jusiñamui naie eniruena niraïdotade. Jusiñamui jiaïruido jiaï llote: “Eniruena dane niraïdotaiticue. Ucuaina, fivuina, jitoma diga, jiaï niraïdotaiticue” llote. 27 Naimie lloga uaimona enirue fuillena uiñoticaï. Monamo ite ra fuillena jiaï uiñoticaï. Nana naie rana naimie fuidoite; iadedi naimiena cai ñnua jira, naimie caina fuidoñeite. Ico cai illinona jai finode. Iena naimie fuidoñeite. 28 Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai ñnuamona, naimiena cai raise sedajamona, naimiena cai iobitaja. 29 Naimiena ñnoñedinona Jusiñamui eo duere finolle jira, naimiena jaciruillanona naimiena cai ñnua.

13

Jusiñamuina cai iobitaja

1 Dani conini jiaïe creyentiaïna isiruicana omoï jai. 2 Abraham micorï Jusiñamui jaienisaïna uiñoñoeno jaie nafuete. Jiaïe illanomona jiaïe creyentiaï bia, naimaci inillino iñena jira, naimacina nafue. Jusiñamuimona ibana feiñoitomoï. 3 Cristo rafue muidona damierie

creyentiaí cárcelmo itimaci. Nainomo omoi jiaí itomoidena, naimacina feitaño. Naimacina isiruillamona cano. Damierie creyentiaí duere sefua, naimacina jiaí cano. Jiaruido naimaci isoi nibai duere sefuitomoi. ⁴ Airedimie jiaie riño diga illemo ie comecina facañena. Inirediñaiño jiaie iima diga illemo ie comecina facañena. Ie aiñede riño diga bu ia, ie iniñede iima diga bu ia, maraiñede. Iena finoño. Iena bu finoia, ie jeacino Jusiñamui lloñena, Jusiñamui naimiena duere finoite. Naiñaiño jiaí duere finoite. ⁵ Ailluena ucube ollena, iemo nicñeno. Omoimo ite ra diga caimare i. Iena Jusiñamui facaina lloraima jaie cuela: “Jusiñamui llote: ‘Omoina jaca canoíticue. Omoina jaca fañonocaiñeíticue’ llote”. ⁶ Naiena cai uiñuamona, cai comeciaina ocuiñoíticai. Jaie cuela fue isoi lloíticai:

Cai Nama caina canoite.

Ie jira cai comeciái jarire finoñeíticai.

Buena jaciruiñeíticai.

Jiaimie buena caina jaciruitanide.

⁷ Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo díbeimo naimaci illamo omoi comeciaina facajanona, naimaci isoi Jesucristona ñnocana mai omoi jai. ⁸ Naimie jaca ñnogamiena uiñotícaí. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiena cai ñnua. ⁹ Cristo ieñede rafuedo jaiño. Diga jiaie llofuiacino ite; iadedi iedo jaiño. Jusiñamui caina canuamona, cai comeciaina birui ocuiñocana jaitícaí. Moisés micorimo lloga rafuedo navui jaidícaí.

Diga ra fimaide; iadedi naiedo cai jaillamona, cai comeciai raise illena, buena oñedicaí. ¹⁰ Cruzmo Cristo fiodaillamona, cai jeacino facaina fodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. ¹¹ Moisés rafue llua isoi, nanoca ñairaima toiniaina faja mei, naie dirue dacaiño naga año fo iticuartomo uite; iadedi naie toi abí naimaci comini illanomona jino uite. Iena jai jitaiñena jira, nainomo iena jobaide. ¹² Ie isoide. Cristona comini jitaiñena jira, ie comini nairaimona jino uillanona, naimiena meinetimaci. Nainomo jeacino facaina fodaite, comini comeciaina raise finollena. ¹³ Ie jira Moisés micori lloga rafuena cai fañonocaida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca ñnocana cai jailli. ¹⁴ Beno jaca cai illemo ocuiriñedicaí; iadedi monamo Jusiñamui diga cai jaca illemo ocuiridicaí. ¹⁵ Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja. ¹⁶ Marecinona finocana mai cai jailli. Jiaie creyente jitai raillano, omoi raruiamona naimiena omoi cano. Iena omoi finoia, Jusiñamui omoi iobite.

¹⁷ Omoi llofueraíni uaina ñno. Naimaci anamo raise omoi i. Cristo dibeimo omoína raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi ñnoia, Cristo dibeimo caimare maijitimaci. Naimaci uaina omoi ñnoñenia, sunaitimaci. Sunailla jira, naimaci llofuiacinomona buena oñeitomoi.

18 Jusiñamui diga omoi ñaia, cai facaina omoi jii. Jusiñamuimona cai comeciai marena illana uinoticaí. Naimie jitailla isoi, mare rafuena finocana jaiacadicaí. 19 Omoi dine cue raire illena cue facaina Jusiñamuimo eo omoi jii.

Naimaci marena jaca illana jitaide

20 Jusiñamui conini omoi comeciaina uri itatajana jitaidecue. Cai Nama Jesús fiodailla mei, Jusiñamui naimiena jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede. 21 Jusiñamui ie jitaillacino omoi finuana canoite. Cristona omoi inuana canoite. Mare rafuena omoi finuana canoite. Jesucristo uaido omoína canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidecue.

22 Cue amatiai, bie cartana caimare feiño. Eo are rafuena cueñedicue. Janore cueticue. 23 Cai ama Timoteo cárcelmona jai jino bite. Cue dine naimie raire bia, omoi dine naimiena atititue. 24 Nana omoi llofuerañimo cue uaina oredicue. Ua nana creyentiaimo cue uaina oredicue. Italamona bitino imaci uaina jiai oredimaci. 25 Jusiñamui omoína jaca duenaillana omoi uinuaana jitaidecue. Mai. Macaibaite.

Jusiñamui uai: Jusiñamui jito rafue illa rabenico
New Testament in Huitoto, Murui (PE:huu:Huitoto,
Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 3 Mar 2023 from source files
dated 29 Jan 2022

145a1f66-dca1-5de3-9c00-4e533605e488